

四庫全書

集部

# 欽定四庫全書

集部

方齋存稿卷八

十至

詳校官中書<sub>臣</sub>葉元符

中書<sub>臣</sub>劉源溥覆勘

總校官原任中允<sub>臣</sub>王燕緒

校對官編修<sub>臣</sub>陳昌齊

謄錄監生<sub>臣</sub>葛魏錫

欽定四庫全書

方齋存稿卷八

明 林文俊 撰

誌銘 祭文

明山東兗州府推官馮公墓誌銘

嘉靖庚寅七月廿七日蘄州馮公以疾卒於正寢明年三月某日塋州之清善里佑興山祖塋之次其孫鄉貢士天馭方歸勾太學奉廣東按察使張公齊狀詣予請

銘墓按狀公諱翺字時舉號雷崖世居蘄州曾祖某祖某父某母陳氏公穎敏強記年十四補州庠子弟員屢躋場屋以貢入太學試京闈又不利正德某年授山東兗州府推官治獄寬恕民有其父死而誣為怨家所殺者獄久不決公至郡廉得其狀召諭之曰汝父實病死汝不速殯顧欲緣是以陷人於罪耶縱成獄亦必啟棺驗眖殘傷遺體汝其忍之乎其人聞之兄弟相向號叩首伏罪一郡皆稱其明承委督所屬逋賦例有賂遺或

以告公驚曰此何例召賂者亟以還民否且抵罪於是  
邑惴惴奉法所督賦常先列郡而集踰年告老歸郡守董  
君旭為勇退圖贈之公事親孝為諸生時旁舍火起公  
自外望見亟馳歸入負母及取先世告身以出餘無所  
問已而火亦尋滅居父母喪哀毀成疾既免喪忌日必  
哭四時祭薦必豐歸自兗州他無所營惟以治先塋及  
祭器為急二弟早卒為卜地營墓如禮而撫其孤不異  
已出族姻故舊婚喪不能舉者皆周之家有多景樓晚

年日與賓客觴咏其中或閉戶焚香燕坐怡如也卒年若干配羅氏有淑行先公八年卒子男四鵬鸞鸞女二適某某孫男七天馭天駟天驊天駿天駟天馴天闕皆業儒孫女六銘曰

穴趾竣墉具成易毀奔腹侈喙具出易匱嗚呼  
雷崖德浮於位為家孝子為郡廉吏廉不近名  
孝有錫類嗚呼雷崖我銘無愧

洪母太安人吳氏墓誌銘

太安人吳氏贈主事洪公南湖仲謹之配今紹興知府  
珠之母也正德丁丑十月廿二日卒卒之四年辛巳珠  
舉進士為戶部主事明年以尊號恩贈為太安人珠既  
歸襄事又自狀其行逮予銘按狀吳出宋狀元叔告太  
安人之父諱朝器母曰陳氏幼有至性年十八歸南湖  
公逮事先姑姑常稱其所為以勵諸婦姑既老代綜家  
政一毛不入私室奉其身及子女甚涼而所施率厚南  
湖公不治生業又常鬻田貸金以賑人之急家以故落

而好賓客好施與不倦太安人密為區畫以佐其費公兄弟多先物故則又贊公買地墓之一切經費多出太安人公弗知也珠幼慧公以舉之晚也甚慈之太安人嚴督之學曰汝不思成叔父之志乎叔故鄉進士初也珠力學有名正德癸酉取鄉解于是公已歿太安人率以拜祠下教且泣珠亦泣丁丑下第歸至家太安人疾已革聞珠聲急下牀抱以泣曰吾兒至矣越數日竟卒年五十九男二長珠由郎中出守以文行器識稱娶余



封安人次琨娶朱女三長適翁渠卿次適趙以新又次  
適翁槃者側室陳出孫男三應奎應璧應參孫女四南  
湖公存日嘗自營壽窆於其兄弟墓側既成以為不祥  
曰必改卜也太安人垂絕語又及之嘉靖乙酉珠改營  
紫帽山西淙白水之坑頭之麓以四月十七日以二柩  
合窆從先志也銘曰

洪出忠宣其後必興遙遙華胄南湖是承惟南  
湖公其殖既厚有吳相攸亦會之邁顯命伊始

千里分麾自昔奚為惟後之貽兆于牛眠協于  
廟食永世烝祀惟以考德

故福建右布政使致仕晉階資善大夫澤西杭公  
墓誌銘

嘉靖甲午閏二月八日澤西杭公卒春秋八十有三公  
之董學于閩也文俊猥出門下辱陶甄焉竊祿以來違  
逖門牆餘二紀矣前年公以八十自壽詩并手簡遺予  
其字細楷不類老人書謂壽且耒艾也乃遽至是乎計

至南京予哭於寢為文祭之後數月封走使者來告遠  
日願為幽室之銘嗚呼予胡忍弗銘按給事毛君憲狀  
公諱濟字世卿其先自中州來居於杭后從宜興東霞  
埠始祖邦愷再徙今百瀆里在笠澤之西故公自號為  
澤西幼穎異十歲能為詩長從鄉先生卜從大遊博綜  
經史貫穿百氏為文下筆沛然與弟都憲公淮皆以文  
學見重三吳弘治壬子年四十一領應天薦明年第進  
士授吏部稽勛司主事進考功司員外郎家宰喬公宇

時為郎中公與協心共事考覈臧否允愜時望進稽勲  
司郎以親老乞歸省亡何陞福建按察司副使督學政  
以善俗作人為已任教人必先經術而本於德行以身  
先之士習翕然丕變當署司印或以儒生易之公揆情  
定法狴無滯囚老吏驚服使者飛章薦之當軸以舊銜  
抑不以聞久之陞布政司右叅政值汀漳用師屬公督  
餉曲慮周防寇不能掠鈔軍食饒給踰年賊平分守邵  
武威行惠敷吏民畏愛之大方伯朝政京師公當攝印

適交承吏盜印去公不為意既而得之封識宛然人以  
其量似裴中立竟坐是調廣西尋丁父憂服除補河南  
左叅政分守南陽南陽地近湖襄流民雜處且多豪強  
公開示以禮而裁抑以法衆皆帖服宗室以讒欲置人  
於死公曰吾不能殺人以媚人力爭不可竟釋之陞福  
建右布政使閩人聞公再來懼聲溢路既至輕徭省賦  
民因為之甦醒有賂鎮守市舶議造海船者臬司亦為  
所惑公獨抗議以為不可其事遂寢正德丁丑以年及乞致

仕優游林壑將二十年兩遇覃恩階晉至資善大夫公  
為人慇直剛方言動必以禮與人交不為妍媸取容有  
過則面斥之然胸次洞達坦夷不設機械故人雖憚其  
嚴而樂親之居官任職不避怨嫌尤以冰蘖自勵  
為吏部時監司有以千金求脫重辟者叱而去之  
既致仕屏跡不至公府鄭御史慕按部至常求見不  
可得以楮金為遺問禮固辭不受清撻類如此雖貴  
不畜姬侍年六十三喪內子遂不復娶居常獨寢一堂

命童子侍盥櫛而已事親至孝間得美味親未嘗不敢  
先嘗居喪不以衰廢禮友愛諸弟出入必階遠出公以  
老用兩人舁都憲公常衣冠徒步從後鄉人賢之卒之  
前一日偕諸弟泛舟飲酒賦詩樂甚約明日遊蓼莪庵  
比曉攬衣下床問霽否趣家人治具忽噤而遊聞者皆  
悼惜之曰善人亡矣故舊門人有千里來會哭者郡邑  
大夫臨弔致賻綖以明年某月某日葬某山之原從先  
域也曾祖敏祖徵父倫封吏部稽勛司主事母王氏贈

太安人配王氏封安人子男一太學生封也文行不忝  
其父孫男三惟銳惟純惟純孫女五自少至老手不廢  
書為文章典則莊重如其人尤長於詩所著有澤西稿  
聯句集若干卷銘曰

杭世縕善雌伏弗愆委祉禪體慶澤蜿蜒乃及  
于公昂昂軒軒志惟慕古學乃沂源爰自稽勛  
出秉文螭身為型範教豈空言晉叅省政遂長  
薇垣公曰退哉無若觸藩乞身于朝養高丘樊



其所未食以貽子孫歲時之佳或琴或樽山躋  
溪泛偕其弟昆金春玉應詩編討論流風所被  
薄俗為博嗟公齒德邦人所尊水之渤澥山之  
崑崙今則已矣問于九泉刻詩墓門公乎永存  
故淳安縣知縣姚君墓誌銘

姚氏先世光州人在唐俊傑偉兄弟皆登第稱三龍者  
始入葦居泌園元右丞都副使崇再徙涵江三世鑒又  
從湖洋塘之電陂即今所居君曾祖紹秩祖資德父封

君商皆縕德不仕委祉于後故君與弟御史鳴鳳及其子推官虞先後第進士封君以御史貴蒙恩封南京太常寺博士一門簪纓蟬聯葦人榮之君諱鳴鸞字景雍八歲能屬文御史少四歲亦穎敏甚封君歲延師教之君進則質疑於師退以所聞授弟家庭之間自為師友學益長進正德庚午領鄉薦庚辰與季父今郡守正同捷春闈屬武宗南巡未奉廷對明年今天子嗣統臨軒策士君登進士第試政兵曹首上疏言七事一曰崇聖

學以端治本謂古今近臣蔽主必以聲色娛其耳目陛下宜法祖務學鑒前代興亡之跡絕外好斥嬖佞則本正而化行二曰明典禮而抑驕縱謂禮莫先於正名今尊崇之典議者紛紜宜早為裁定而戚畹怙勢奪民產其風尤不可縱三曰立紀綱以肅朝政謂國朝正統以來內臣王振曹吉祥劉瑾相繼濁亂朝政及各處鎮守索貨害民皆宜預為之處四曰清言路以審取舍謂正德末年臺諫沮氣今宜開言者之路其言毋足採者置之

則取舍當五曰保聖躬以固國本謂國朝之制太子未立親王不遣之國自劉瑾蓄逆在京師不留同姓國本空虛宜復祖宗之舊六曰敬大臣以隆國祚時大臣有繫詔獄者故云七云汰僧道以闢異端其言皆鯁直不避忌諱聞者壯之是冬當選以親老疏乞近地校官以便祿養不聽除知浙之淳安縣先是經費外多無名之徵上下肆為乾沒民瘼滋甚君至立為減革歲所省不貲當道嘉之取以試他郡豪家賦不時輸貽累貧民君以

理曉諭不從則痛繩以法自是邑無宿逋民免於累縣  
丞李才死非命為直其寃且葬以衣冠雖忤用事者不  
恤先時大旱三月至是忽大澍遠近霑足人謂之洗寃  
雨歲歉發廩賑饑全活者數萬人淳俗厚嫁女故生女  
多不育君嚴論財之禁申舉女之諭俗為之變生女多  
以姚名之淳遂之間有銀冶上生毒草爭者不勝輒服  
草死訟無虛日君塞冶薈草爭遂息君事練而才優雖  
政務叢沓而從容酬應常若無事以暇日脩邑志葺廟

學及壇壝祠墓之類既成皆自為之記在邑三年百墜  
具興惠化旁洽邑人刻碑頌德巡按御史潘君倣薦  
於朝嘉靖丙戌考績至京歸遘疾以是歲四月三十日  
卒德州泊頭鎮享年四十君之喪過桐江舊民迎哭不  
勝悲相與設奠致賻送至數百里而後返邑師生以  
君治行白於浙當道覈得實祀於名宦而葺復祀君於  
鄉矣嗚呼君雖短世而兩地廟祀血食無窮此豈可以  
百年論脩短者哉君事親至孝既仕恒以親老不及養

為恨與御史君極友愛一衣之華一味之甘必共之如是者蓋終其身家譜久不脩為訂訛補漏族人賴之與人交忠信不欺對妻孥御子弟無惰容媒語君之內行脩飭如此宜其設施見於外者卓卓乎度人遠也配董孺人同邑處士某之女治家嚴而有則在官所隨事規益君得其助益多君之歿也孺人及二女在側皆以哭君致疾已而長女先卒葬丹陽石羊村至吳江孺人繼卒為是歲六月二十六日享年四十有一子男三長虞

今為鎮江府推官治聲籍甚次夏平海衛學增廣生次  
殷孫男一君以嘉靖某年某月日葬某山之原董孺人  
祔前事推官致君御史君狀以速銘於予予悲君之志  
不得大施於時也因其自號亦云而為之銘曰

嗟若雲乎郁郁紛紛蕭索輪囷其出岫也吾不  
知其何心其散去也吾不知在山之阿抑河之  
濱乎噫歲方旱燠物如煖焚雲乎雲乎夫既從  
龍而為霖矣胡不普厥施而膏之屯吁嗟乎云



鄉進士范君墓誌銘

甄寧范生德卿以嘉靖乙未八月十有七日卒於家君始得疾自度不起即為書告其尊甫今南京少司空衢村公詞若訣別者公得書憂悸不知所為惟禱於鬼神問於卜筮而已既浹月凶問果至公卿以下皆往弔慰公對客涕汪汪下明日具疏乞歸謀其葬事預屬同邑鄉進士楊生應詔為狀而以請銘于予予于公忝有鄉好義不可辭爰為序次而銘之曰范氏先世居汝陽唐乾

符中有仕閩者值黃巢亂因留建州子孫世家焉君曾  
祖某祖太學生某贈中憲大夫廣東按察司副使父衢  
村公嵩起進士洊官至大僚為時碩人娶唐恭人無子  
側室吳氏生君於宣州官舍因名曰宣字德卿幼穎敏  
出語驚長老同郡太僕少卿楊公亘試之嘆曰奇材也  
因許妻以女年十三隨宦河南少司馬王公珣時為叅  
政試以唐主賜徐世勣李姓論伸紙拈筆數千言立就  
出經入史新意湧出王公命之歸補郡庠生嘉靖壬午

年十七以易經領鄉薦上春官不利卒業胄監益淬勵  
為學六經子史下至星厯地理諸書靡不淹貫為文章  
善徃復馳騁不為步驟所縛而必歸於理祭酒司業得  
其所試奇之特加敬禮尤注意天下事凡屯田馬政漕  
渠邊防皆嘗考究具有成說歷歷可行不幸未及試年  
三十得羸疾以卒於乎有足悼哉君早喪生母鞠于適  
母唐恭人愛如已出公宦遊四方恭人留治家務君在  
膝下左右承順動求愜意事無巨細咨而後行恭人歿

哀毀骨立喪葬悉遵古禮與異母弟某特相恭愛某有  
小過公欲撻之君即跪為救解蓋其孝友之篤如此乎  
日服食簡約賙人之急出貨刀猶棄粃粃族姍故人顧  
恤尤至初公以大中丞撫蜀蜀邇番夷連歲用兵君奉  
書於公曰兵凶器也傳曰師之所處荆棘生焉自古善  
制邊者不師而不殺惟大人慎之又常寓書勸公早歸  
曰願大人毋過為子孫計嗚呼此豈尋常士大夫家子  
弟所及哉君娶楊氏少師文敏公六世孫先一年卒有

予一人曰學詩生八齡矣女二人長許聘滕氏子某君  
卒明年卜某山之原日食卜葬以某月某日又食遂以  
其日窆銘曰

疇之沃矣爰有嘉穀既芟既柞而胡不獲山之輝  
矣爰有良璞既磨既琢乃毀于櫝惟君之系休  
聲世繼以及司空令德豈弟毗國克忠牧人以  
惠施及胤嗣有慶實延不位不年孰訊于天惟  
躬不然後將多賢何以徵之悶辭幽阡

東石談君配蔡氏墓誌銘

孺人諱秀字榴卿姓蔡氏松之上海人西山先生之後處士某之女年十七歸同邑談氏為東石君之配東石名田其尊考侍郎彛庵公始擇婦於蔡氏孺人方在髫齒特為所奇既來歸執婦道謹甚姑太淑人張氏愛之教以詩書輒能記不忘浣滌縫紉饋食之事必躬任之太淑人老且病恒語人曰吾十年之生孝婦所致也及卒孺人哭之幾毀侍郎公慰以詩及侍郎公歿哭亦如

之惟時東石業舉子家事屬焉綜理周密凡歲時伏臘  
賓祭之供至於米鹽之細具有條序不以煩東石東石  
以其故得肆于學為古文詩歌日以有名然試輒不利  
孺人慰之曰斯命也已東石年三十八尚未有子孺人  
勸立兄子為後其上太學也出鐸釧內之袖中曰願以  
此置妾生子也東石如其言果連生四子及兄子破產  
東石怒甚孺人多為好語解之兄子天死撫其二孤尤  
恩仍分產與之人以為難東石喜賓客樂交遊孺人戒

媵侍日治具餉之雖歲入無贏弗計孺人生男多不育  
僅一女甚慈之然衣食必均諸子人莫能辨嘉靖乙丑  
五月二十七日疾既革猶處分家事語畢而逝略無怛  
化意春秋六十子男四賓之戚之家之寧之孫二琥瑋  
女六長適光祿卿陸公男太學生棐即孺人出次適學  
士沈公曾孫太學生載采次適尚寶卿張公孫堯允次  
適都給事張公男琨餘幼未聘東石以庚寅冬十月葬  
之鶴坡談氏青山自為狀次其世出行事命棐來請銘



予聞東石名二十年今觀其狀孺人之行如此則孺人之賢亦女流不易得者寧不稱其為配矣乎銘曰

猗歟孺人允迪壺彝由婦而母克孝以慈顯允  
君子蔑有文辭伊疇翊之曰得其嬀弗偕于榮  
命也則尸閼銘幽墟庶永其垂

故南京戶部郎中進階朝列大夫致仕澹庵方公  
墓誌銘

予少聞先生長者言吾葦先輩有郎中方公者恬退不

嗜榮進居鄉敦行古道俗化之予願執鞭焉而恨生之  
晚比在京師公之孫禮部郎中瀾間語予曰先祖之行  
族伯父叅政公達已撫為狀然未有誌于石者今請先  
生追為之可乎予曰近世士大夫率有銘以墓然不數  
年形迹漸滅鄉里不復省記其姓名者多矣公墓雖無  
銘至今將六十年談誦盛德者若出一口然則公豈恃  
銘以為不朽者哉雖然予聞公之賢倘因吾子之請得  
執筆銘公墓乃所願也瀾聞之遽以狀請按狀公諱迪

字從善號

闕

嗚呼公於是時年老而官淹然且挺然

特立不肯附麗故人以規進取斯其為前輩君子之風乎性無他嗜惟喜讀書六經子史百氏靡不蒐究為文章典則溫厚詩宗盛唐致政家居不營貨產惟與騷人韻士唱和于松皋荔圃間竟日忘倦然多不存稿既歿子孫搜葺散逸僅得一二曰澹庵稿藏于家平居造次必在禮法無惰容媒語子弟嚴憚之成化某年某月某日卒正寢享年七十有二初娶顧氏贈宜人再娶鄭氏

皆有歸子男四銘曰

禮以為馭德以為興行乎康衢坦坦舒舒世之  
所趨我則徐徐豈獨司馬政府無書壽水之上  
既懸巾車食惟先疇居有敝廬彼仕而休腴田  
廣居曰可長存轉瞬而墟論世攷德孰與公如  
我銘匪諛公永有譽

監察御史鄧君墓誌銘

奉新鄧君顯麟字文瑞正德甲戌進士授行人司行人

已卯之春武宗將南巡君偕同官切諫謫國子學正今  
上嗣位收復舊職未數月擢浙江道監察御史差視長蘆  
鹽法還兼掌鹽政亡何奉命巡按湖廣將滿得奇疾疏歸  
就醫至家踰月以嘉靖戊子三月十一日卒於正寢君  
天資高邁幼知嗜學既仕不廢經史為學正時京闈聘  
典文衡鑒別公明所收多名士其為御史也初理長蘆  
鹺政已著能名及按湖廣未入境已廉得吏之貪鄙及  
事之為民害者既至立黜罷之民吏驚服彭明昶叛督

軍討平之事聞賜白金綵幣軍中冒功妄械平民君察知其誣立破械釋之所全活者甚衆比謝病歸德君者密走送至數千里皆哭而別居家孝友與人交表裏一致性剛果遇事是是非非不為脂韋媵媼以取媚於俗盖年四十五而卒曾祖某祖某考某泉州府學訓導以君貴贈監察御史母某氏封孺人君娶同邑某氏亦封孺人男二長廉甫邑庠生次寬甫孫男一廉甫等將以某年月日葬君某鄉之原先事以狀授予從子景輝來

請銘景輝宦于其邑凡君施于家儀于鄉者歷歷能道之若其施之朝廷者焯焯在人耳目予與君仕同朝聞之最久又不必徵之狀而後信也宜為之銘銘曰

吁嗟鄧君良柱下史出采民風入司邦紀泛駕之足期邇遐軌誰其厄之不使千里卜藏斯丘萃和延祉春秋來拜濟濟孫子猗歟盛德百世烝祀

明故中順大夫直隸太平府知府熊公墓誌銘

公諱蘭字天秀姓熊氏相傳為楚子熊繹之後世居南昌枋塘灣入國朝始徙今板湖高祖德讓洪武中為江右十八才子之冠徵至踰期出監泉州稅德讓生素敬素敬生資直贈承德刑部主事生昭以公貴封文林郎監察御史公早負雋才刻勵問學治詩切理脩文不事雕琢最為提學二泉邵公所知正德辛未舉進士授行人司行人奉命搗師于東南比還朝擢福建道監察御史出理河南嵯政歲終代還以外艱嘉靖壬午服闋赴闕改



河南道巡按廣東亡何擢直隸太平府知府至郡五日  
坐讒落職盖公出處終始之大致如此公精敏闇䟽遇  
事立可否在河東值鹺政積弊之餘剗剔爬梳弊端窒  
穴諸所條畫皆可經久行之至於興學勸士毀梓潼像  
以祠先賢尤有補於風教都御史張公檜特䟽薦之還  
以材兼數道有大事待公而決公素為逆藩宸濠所忌  
正德己卯濠逆謀寢露乃繫公之父及弟姪輩于獄以  
箝公口公聞之哭曰事已至此吾不言則誤國言之則

逮父兄之禍為之奈何乃具以濠必反狀告其同年御史蕭君淮而屬蕭君奏之又因所知密白東敵具以其事聞上大怒詔捕濠諸用事者已而降勅遣中使大臣往諭之使者及境濠果反不踰月竟敗初濠見蕭君疏不知其謀出於公故公之父兄幸免於難君子謂公之為是忠與智俱焉其在廣東窮歷嶺海所至旌廉黜貪洗冤澤物潮州衛指揮王某或誣以失律當斬繫獄十餘年公訊知其冤并其黨數十人皆得末減性剛介當

官直道而行法所當按雖達官要人未嘗寬貸人服其  
公然竟坐是遭讒以廢嗚呼惜哉公以嘉靖戊子六月  
二十六日疾終于正寢享年五十八以己丑十二月二  
十四日葬本里之楊園後五年奉禮部主事張公鑿狀  
徵銘於予將追納諸幽予與公同年交契最厚故不得  
辭銘曰

溫溫為人揭揭為吏和而非同介而非異內持  
臺諫不撓不揺出按郡邑魑魅潛消蠹爾逆藩

敢窺神器結援內交謀深劉潯公首攫之奮不  
有躬惟君惟親展也孝忠古之遺直謂公則有  
惜也不容橫罹讒口伊誰為之惟命則然曷永  
其傳闕名幽阡

明故尋甸知府進階亞中大夫績溪戴公墓誌銘  
績溪戴公與予同第正德辛未進士自官南省與予別  
十四五年矣去歲冢子嘉猷自烏程尹召入為給事予  
因得聞起居乃未浹歲而訃至矣追念今之世篤行如

公者少也而今已矣則予之悲豈直以同年故舊之私也給事君將奔喪歸襄事屬刑部郎中葉居份為狀來速予銘嗚呼予奚忍弗銘按公諱祥字應和自幼嶷然有異質弘齋府君深器之年四十七始舉進士為行人司行人奉使長垣王府恪事慎儀王禮異之贈賄一無所受秩滿進司副頃之陞南京工部屯田員外郎以外艱歸服除值今天子嘉靖初元改戶部尋陞禮部精膳郎中皆在南京亡何陞雲南尋甸知府引疾乞致仕既

歸五年以覃恩晉亞中大夫公之為戶工二曹郎也或疑公以曹事為濶公笑曰人自濶曹耳益勵清撻常祿外不苟取一芥及為禮曹政務清簡公退則閉齋誦讀而已致政之後不入城府杖屨所及非槐溪書院則靈川草堂耳居閒惟課子孫讀書及脩訂先世譜牒餘無所問邑大夫歲舉鄉飲延公為大賓常不赴嘗有論薦于朝者竟弗起公嘗言學貴力行不貴空言近世學者卒能談道性命及考其所至不戢于聖賢者少矣故公

之為學踐履之功多於講論及其教人亦必以是焉嗚呼斯其所謂篤行君子者乎公生於某年某月某日娶胡氏稱賢配封恭人子男二嘉猷丙戌進士在外稱賢有司立朝為良諫議文學器識士大夫稱之次嘉謨邑庠生銘曰

惟名所在擾擾競馳公務晦迹罔覲人知自道弗明曉曉力辯公恥空言要以自踐奚而弗宜官止一麾奚既歸老子在瑣闥德厚食微慶

叢孫子琢辭於阡以詔于祀

明故戶部主事鄭君暨配陳安人合墓墓誌銘

予與鄭君宗獻同領鄉薦正德戊辰君第進士除戶部主事明年以疾卒家貧子稚聞者傷焉去之二十年當嘉靖己丑其長子綱起進士又主事戶部矣予見之喜鄭君有子也而問其母則即世與君俱葬矣於是太息久之綱因泣請曰先人雖就窀穸未有銘綱也懼無以白潛垂遠敢以累執事予應曰諾爰徵都憲藥谷王公



大用狀而銘之序曰鄭氏其先興化縣人君高祖德驥  
洪武中以尺籍隸興化軍徙葺城南之石門曾祖文永  
再徙城東祖商父逸庵公崇皆有隱德君諱璣字宗獻  
莊重寡言舉措必以禮平居物物無忤至抗俗嫉邪則  
義形於色自以迂戇不能徇俗曰世之愚莫我若也號  
愈愚子性孝友幼時讀書將就寢必造逸庵公牀下問  
起居晨興亦如之書過目即成誦下筆為文簡當平實  
而歸宿於理在郡庠試輒居首名公貴人爭迎為塾師

束脩悉以養親及贍其同產無私儲焉既為主事分曹太倉時逆瑾虐方熾凡財賦所出入地靡不搜索君以清脩獲免已而齎鋹宣府其羨悉入於官歸至京數日病卒垂絕謂配陳安人曰吾父喪在淺土吾母老子幼今且死天乎後事惟汝是賴又顧綱勉以力學養母目遂瞑是歲己巳又九月廿九日也年三十四家無羨錢假貸以為殮具弔者無不出涕陳安人同邑玉山村人父陳珪母周氏年十六歸君守禮食貧婦道脩具君登

第之明年迎至京師甫半歲而君歿殮之日將以死從  
既而私自計曰吾即死吾願畢矣誰為養吾姑鞠吾兩  
穉子其若遺言何乃忍弗死以其喪歸之又明年哭其  
姑時家益貧蘖谷公言于當道助之葬乃克葬君及舅  
姑三喪當其時安人竭力襄事朝夕食惟饘粥而已二  
子幼多疾疾日持辦香禱于神無故不令出中門夜則  
篝燈課之誦讀嘉靖壬子鄉舉于鄉安人喜曰吾可以  
見夫子于地下矣亡何寢疾其卒以是歲九月二十日

年四十六後以絅貴蒙恩追贈安人云墓在城南廣化寺之東丁丑君寔乙酉安人祔二子長絅字子尚文行克肖其父在戶部有籍籍聲娶訓導陳洧女封安人次紹郡庠生既孤藥公妻以女曰吾與汝父有宿言銘曰吁嗟鄭君國之良士而仕而學望實並峙誰則尸之而止於此吁嗟安人是有儀軌于拮于据毗夫成子命之不淑而亦已矣玉埋于山劍躍于水其光不滅于百千祀惟躬弗羸後多受祉

明贈文林郎葑田縣知縣坦庵王公暨配孺人黃氏墓誌銘

南京刑部主事王君鉅一日持程節煌所為其父母事狀跼予門泣而請曰鉅之先考坦庵公暨先妣黃孺人之歿久矣乃久未克葬者非故緩也以為葬不得地使吾先人體魄不得寧于地下則寧慎焉雖越禮而踰期弗敢計也今既卜得地于某山之原將以某年某月日奉柩合窆敢丐幽室之銘王君嘗知葑有惠政葑人得

之子又辱君知契是銘宜以屬予予亦不得辭也按狀公諱齊玉字世濟早歲喪父與弟相玉奉母胡孺人謹甚有豪僧奪其先世墓地公時方弱冠慨然曰是可已乎與叔念一訟于官竟復之叔喜曰王氏有子公事叔如父事無巨細必咨而後行友愛其弟當折產時荒頓田園陳敗器皿悉自取之而讓其美者于弟人以比鮑宣云弟嘗遭疫舉室潛逃公日夕在焉或勸之曰弟同胞也吾將安之親注藥療之其卒也為治喪具以殮哭

之哀甚時諸孤尚稚公視如子顧恤周至且為之禦其  
其外侮君子謂於是乎孝友也為人忠厚坦夷耻啟口  
及人過失聞人之善則亟譽之其為耆老也里有爭訟  
者不之官往往詣君取直得一言則皆解去有餽謝者  
笑而遣之歲嘗旱豪右擅水利公往以理為之曉譬羣  
黨屈服利遂均其為鄉里敬信類如此喜閱古史能究  
知其治亂成敗之說尤好吟哦不廢寢食嘗讀易履道  
坦坦有契於心因號曰坦庵其稱之者不以姓字亦曰

坦庵云正德己巳九月初九日以疾卒于正寢年五十  
九配黃孺人諱福璋同邑某之女居家克孝以睦既歸  
公則移其孝於姑移其睦於娣四時享祭及大賓燕親  
尸中餽不以為勞應猝理紛大小各當賻喪恤貧急如  
饑渴宗鄙咸稱賢焉後公十三年以正德辛巳三月三  
十日卒年七十三子男二長傑次鉅女一適某孫男二  
元勛元煦孫女二長許少司馬義峯潘公次子國子生  
鑾次許某惟王氏之先散處南北其居婺之三槐嶺自



諱異始十有二傳至觀奴觀奴生文享嘗刳股以愈母疾又嘗還亡金金郎鄉人以其有是兩事稱為孝廉孝廉生敬保即公之父而自公祖父以上敦本力善者累世矣然未有顯者及鉅既長知學公汲汲延師教之期光顯其門戶黃孺人尤善教每篝燈夜讀則治絲枲其旁以守之訓勵甚至嘉靖乙酉鉅以璧經領應天府鄉試己丑第進士治聲籍籍會郊祀霈恩遂得贈公文林郎葑田縣知縣黃氏贈孺人云鉅方有聲曹署識者謂

其有遠到而公與孺人克膺貤典未已也予故銘諸幽室以俟銘曰

王氏自姬源深且厚太原中去支分派剖來居  
三槐世既云久雖伏弗曜德則多有乃及坦庵  
履道無咎其道維何曰孝與友矧有良婉德維  
公偶揭揭曹郎政學是茂帝曰汝嘉汝賢父母  
恩賁丘墟嗚呼不朽瞻彼三槐手植惟舊我銘  
昭德尚徵爾後

明故封太孺人張母氏銘

銘曰孺人之賢惟天所假自其來嬪人無尤者承夫孝姑  
儷者或寡以鑄其子如金在冶昔也謂何蓬門  
于野今也謂何門有車馬祿養恩封備乃純嘏  
天亦視人報如施舍鬱鬱丘原樹之松檟百世  
展拜于茲墓下

故南京國子監典簿黃君銘

銘曰貌之癯言之迂行之廉隅是為君子之儒我銘非

諛悶于幽墟已矣乎徒使過者為之長吁也

祭文

祭見素林公文

嗚呼自三代以降光岳分裂士生其時或尺短而寸長  
或此優而彼劣長詞苑者或功業不足稱負大節者難  
必其細行之無缺嗟惟我公海內名流當代英杰氣鍾  
川岳之靈學究天人之贖器之利則百試而不摧守之  
堅雖屢挫而不折故自為郎署斥妖僧其始入疏也已

與家人而預訣當是時懦夫見之而覩顏奸邪聞之而  
吐舌既而起廢荐壁中丞彌節江右則首按賊吏之罪  
衆憚其威嚴陰抑逆藩之權人服其明哲雖讒人窺伺  
其旁而公堅白之質終不可磨以涅也泊乎被召征蜀  
公於是時初釋衰經起任金革兩三年中勞瘁百端心  
力俱竭卒之保全兩川剪平遺孽而蜀人之德公者固  
宜為廟祀而像設也晚遭明主召司邦刑淑問如臯陶  
忠誠同稷卨及不合而求去也雖以天子勉留言路合

疏終不能挽公之轍故嘗竊論之公之律已冰玉不足  
為其潔也公之立朝金石不足為其烈也公之出處青  
天白日不足為其光明而川赴矢發不足為其勇決也  
嗚呼公今已矣其精忠大節貫乎天日者萬世如見而  
浩然之氣固將乘箕尾薄風雲而與三光同其明滅也  
遺表上聞天子愴懷公卿嘆息道路興嗟士林失色况  
鄉邦晚出有如某等者固嘗奉教于公矣安得不為之  
盡然而相與揮淚以嗚咽也尚饗

祭南京兵部侍郎石峯陳公文

嗚呼壺山峩峩蘭水溶溶惟公之生間氣所鍾揭揭其  
行溫溫其容摘華發藻蔚為詞宗手提文印士樂陶鎔  
俄落臺職賈禍以忠皇威孔赫既殛元亮公乃叙還剖  
符專墉撫李之治可攝黃龔乃副臬司尋參藩省淹有  
歲年公耻干請誰其汲引為垂長綆遭帝初元賢登允  
混公晉中丞憲節是秉不懦以弛不殘以猛剔蠹鋤奸  
滌冤宥青帝謂廷尉非公莫宜守職逾年嘉聲孔馳遂

貳司馬國鑰攸司威攝凶暴德洽嫫嫫邦人是賴天子  
是毗方期入拜為朝羽儀胡天降厲而止於斯嗚呼世  
有貌直其中叵測公惟至誠外無矯飾亦有險薄巧擠  
陰嗾公每伸手援拔幽谷惟古君子公實其倚懷公不  
見俾我心憂緘辭寄酹有涕橫流尚饗

方齊存稿卷八



欽定四庫全書

方齋存稿卷九

明 林文俊 撰

雜錄

題勅諭

詩

賦

贊

碑

跋

恭題皇上頒賜羣臣勅諭後

此我皇上正德六年因天下諸司入覲而勅諭之之語  
也是時奸慝初除皇上方與天下臣民共圖維新之治  
故黜陟之典視昔加嚴而戒勅之詞亦加切焉于時壽

寧知縣臣尹袞實獲霑賜大哉王言乎臣文俊伏而讀之有以知皇上之心切於為民如此抑不知中外臣工果能一一祇承德意不墜職業乎將貪殘玩愒如聖諭所慮者容亦有之乎則臣嘗致慨于斯而深有取於袞之賢也壽寧當萬山中豪民多持吏長短為政者患之專事姑息及袞來為令始為畫一之規與民更新久而而不悛乃置其尤者數人于法由是豪宗屏息善良始安是時逆瑾肆虐諸中貴往來閩中多憑其威以邀賂

入郡縣丞望風肯爭為刻剥以求免禍袞獨不然每事  
為民節省不忍依違苟且姑以應付逃責而已吁亦難  
矣向使天下為邑者皆若袞焉將民有不安者乎袞去  
壽寧為夔州府通判未數年陞知綿州皆有異政御史  
屢疏其賢繼今以往將躡登顯位洊膺璽書之袞圭璧  
琬琰實惟尹氏來葉世世之光袞其敬迓之以對揚在  
下可也書曰天子作民父母以為天下王我皇上之謂  
也詩曰夙夜匪懈以事一人尚與袞共懋之

詩

瑞雪詩並序

恭惟皇天眷祐我國家皇上以聖神文武之資應運中興受天明命為億兆生民主視一民一物不獲其所恒若痼瘵乃身乃嘉靖八年冬十一月雪澤未降上惻然曰朕聞雪者豐年之兆今茲不雪來牟何望其咎在朕躬朕當躬為民禱遂擇日告于太廟世廟潔齋三日凡祈禱之文親御翰墨為之乃十有六日戊申御法駕詣

郊壇禱于天地山川是日五更殘星散彩霽景澄鮮及  
上至壇行禮遂有玄雲從西北來掩映壇壝越翼日已  
酉昧爽上禱于社稷甫成禮而降雪沾洒霏霏至夕乃  
止異矣哉於是自公卿大夫百執事至於閭巷細民莫  
不踴躍懽忻快覩豐年之瑞以為我皇上至誠感格其  
速若此雖殷湯桑林之禱不是過矣臣竊思之人君父  
天母地而為之子夫子於父母苟事之弗以其道未有  
能得其懽心者仰惟皇上嗣登大寶于今九年凡一言

一行一政一令罔不奉若天道蓋天之肖子也是以天心悅懽有感必應豈一朝所致哉臣待罪詞苑目擊休徵不忍喑無紀述固知淺陋之詞不足以形容聖德萬一然亦葵藿之枕不能已也詩曰

天生聖人為民立極六合順軌九圍承式惟辟奉天惟以乂民民物乃康祥禎聿臻於赫聖皇允惟民主仁覆普天德超邃古時維仲冬雨雪愆期聖心惻然軫我民饑曰災所由厥咎在朕我其躬禱為民請命齋肅郊壇

庭燎有輝大君戾止淠淠龍旂既類既旅對越在上神  
監孔昭錫之靈貺始自西北有渰浮浮迨于既夕望之  
油油詰旦禮成雪霰交集飛若玉屑化為瓊液匪亟匪  
徐巧當其時惟帝克誠昭假不遲彌望皚皚藏污掩慝其  
令所加歲無螟螣既沾既足我畝我疆其兆維何豐年  
穰穰頌聲載路既阜民生乃永皇祚勿謂蚩蚩民惟邦  
畿勿謂茫茫天高聽卑天難忱斯惟德是保惟皇祗德  
奉若天道厥德不回受祿于天臣拜稽首天子萬年

白氏世恩圖為秋官應衡賦

太行西北來靈秀鍾豪俊君家更挺出文物魁三晉  
審孝廉父首應天朝聘道高位不酬慶遺集後肩桂枝  
叢一門雲翺翔千仞臺諫及省郎所歷多清峻雨露一  
何深五葉同沾潤念茲非偶然聖代逢堯舜何以荅主  
恩勗哉摠忠藎

山川毓秀堂為詹簿王下賦

虞山東來何岑嶽下有川兮橫鳴琴山盤蜿蜒逸虬狀



水瀉泠泠太古音君家住此年頗久新製茲堂為奉母  
登堂雲氣上萊衣開燕山光落杯酒地靈人傑有由然  
郎署聲華記昔年已幸鳳毛能濟美况聞繞膝諸孫賢  
自是君家積德厚百代遥遥多華胄為我並語堂上人  
勉旃勿負山川秀

賦

瑞鹿賦並序

皇帝臨御之十一年冬十一月有白鹿見于河南靈寶

縣越明年春正月守臣獻至闕下皇帝若曰厥惟嘉瑞  
朕弗敢知賴皇祖皇考之德暨皇太后之訓式克臻茲  
其卜日薦于太廟世廟呈于兩宮用昭天貺羣臣其免  
賀禮部臣再請猶不允疏三上祈懇益虔乃勉從焉先  
是諸瑞駢臻頌聲之作盖泐泐然矣乃今靈寶復有茲  
祥考之近歲河清亦在其地異矣哉臣聞自古帝王之  
世至治之極必有禎祥然而間一見焉猶足以震動當  
時焜耀萬世況今日之休徵疊至者哉洪惟聖天子道

參元化德配兩儀丕揚烈祖之洪休邁求先聖之遺典  
禮節樂和功成治定內之華夏外之蠻貊羣生庶彙無  
不熙熙然自得于太和之世皇上功德之隆殆際天極  
地無與倫比是以上帝監觀茲曠世希有之瑞以昭聖  
德神功之盛以兆星輝河潤之祥以永宗廟社稷億萬  
年磐石之固斯豈偶然者哉臣少而讀書歌小雅鹿鳴  
之章欣然想見成周之盛而今叨列從班親睹茲瑞其  
為欣幸可勝道哉是以忘其淺陋謹百拜稽首而獻賦

曰

弘農上郡函關故丘華嶽西峙黃河東流鍾靈孕秀萃  
祉宣休爰有神物兮非兕非虎非熊非貅惟足伎伎其  
鳴呦呦方其為麋也質本皓素性何馴柔浮素華於纖  
毳耿瑤光兮涵秋亮所貴之在茲何凡族之可儔是其  
明輝含乎火德正氣毓乎蓐收者耶想其實沈降精太  
白毓質外至文之彪炳中有德之純一惟茲瑞之不凡  
曷虞人之可即因之感聖世而後生俟明王而後出者

乎於穆聖皇仁孝敬誠叙倫立極考禮正名道光千聖  
澤被羣生中國又四夷賓乾綱正坤維寧蓋功格乎上  
下而治躋於隆平是以百祥降禧二儀毓靈海岳之珍  
畢至毛羽之瑞爭呈彼中州之皓鵠西土之靈兔蹢蹢  
乎先後遊於舜之廷獨何為兮淹留甘在野而食苹爾  
乃踰河渡洛瞻望畿甸隨驛使以遐征藉守臣之表獻  
感林野之微蹤幸承恩於玉殿百辟懼忤聚觀以為曠  
古所無而於今始見也於是天子鳴蒼璧之佩垂紫雲

之表開明堂而受賀薦寢廟以告祥奉兩宮之清燕介  
景福兮穰穰已乃勅命圉臣育之乎瓊林之畔玉山之  
陽俾之從赤豹兮陪紫鸞駕白螭兮驂鳳凰飲玉泉以  
為醴拾瑶草以為糧爾乃委委蛇蛇儼儼麇麇感芻秣  
之厚恩恐圖報之無所願矢心而殫力奉萬歲之明主  
聽簫韶之大奏同百獸以率舞隨麟趾兮上下與騶虞  
而為伍庶以昭聖朝治化之隆遠邁乎漢唐而上躋於  
邃古也

贊

冢宰

闕

公像贊

癯然其貌而內則腴眇焉其軀而志則大其學務深造  
必與古人而同歸其行不詭隨每以流俗為可哿文章  
古雅世之敦彛謀慮老成國之著蔡守不變於險夷行  
不擇乎利害清風直節百僚是師正論讜言一人攸賴  
嗚呼是為闕公之行而世稱以為闕者乎是以忠結於  
聖明望傾乎中外然士大夫為世計者尚惜其留署之

淹而企其端揆之拜也

碑

六合縣尹茅侯遺愛碑

六合古棠邑今為應天府屬號難治嘉靖辛卯茅侯以  
進士來知是邑越五年政成惠洽天子聞其賢徵為刑  
部主事其行也邑父老卧轍攀轅留之而不可得則乃  
相與謀曰曷以報侯乎惟昔順德何侯有惠于我其去  
也我為紀其德政于碑今茅侯繼之政與之同我亦碑



之以無忘侯之德也不亦可乎議既克合則乃告其邑之幕宋元朝予嫻也乃為書具述父老之意而使來謁文予問之曰爾侯之為邑也吾見當道者嘗薦之吾亦聞其賢矣其政何如爾試言之則皆頓首對曰我茅侯豈弟君子也自蒞吾邑刑無苛法無私訟者造庭則引至膝前令自言情徐以片語折之人服其公不煩笞撻而豪胥黠吏及民之不帥化者則必置之法未嘗輕貸也邑當孔道民疲供億久矣自侯之來厨傳賓客之供

十損三四費為遞減而民不知勞常賦之輸歲有定額而巧取者加耗或以倍俟則每戶先給片楮明書某戶應輸若干民以不受誑輸者頓省猶秉介廉之行俸資之外一毫不取民有罪當罰鍰者則令其入粟于廩前後積至二千斛歲凶則散之民賴以活者甚衆廟學嘗壞為脩葺鼎新稍暇輒詣學宮為諸生解析經疑此皆善政之大者其細者雖更僕不能盡也故自我侯之來也吾邑無惰農士知勸學歲穰時和風淳俗美邑無寇

攘民鮮流徙則皆我侯之賜也若之何其忘諸予嘆曰  
善哉茅侯之為政也夫侯之所為皆職分所當為者非  
有所加也然世之為政者不能人人如侯則侯為足多  
矣夫不為侯則亦已矣乃或盈而刑焉濫而罰焉仰拾  
俯攫惟恐利不盈橐焉則乃民之大蠹也嗚呼民亦惡  
用若是者為之令哉其去也亦有思慕之如茅侯者乎  
予方慨世吏治鮮循而喜侯之事有足為勸者故樂為  
之記既以慰邑人思且告世之為政者侯名宰字治卿

山陰世家

跋

跋范文正公遺墨後

右文正公家書二紙於買義田一事尤所惓惓公裔孫彥奎間出見示於是去公四百餘年楮墨如新可寶也已今此田與此書俱存也賢者之澤不深且遠哉予獨怪歐陽文忠公誌公之墓凡公仕宦履歷與其言行之大畧弗備載而獨不及所謂義田者豈以是為細事故

畧而不書耶予觀公在朝切切以愛君憂民為心毀譽  
惟戚一不以介意至於其家則惟憂族人衣食嫁娶喪  
塋之無資而身無以為殮亦不遑恤是皆所謂先憂後  
樂仁人之心也然非其厚本睦族孝友隆於家庭未有  
能忠於其國者也是故公之為義田也乃其平生功業  
大根本處不知文忠公作誌何以獨詳於彼而忽此也  
嗚呼世之居重位享厚祿者徃徃廣市腴田以遺子孫  
曾不旋踵已非已有使公亦徃於世俗之見此田未必

至今存也詎能使天下後世慕其風高其義而稱誦之  
不衰如此哉因拜讀公手書悵然感之輒識數言于末  
簡

方齋存稿卷九

欽定四庫全書

方齋存稿卷十

明 林文俊 撰

詩

五言古詩

劍津早發

孤舟投野宿客睡何曾牢  
起坐候明發去意又滔滔  
霧深埋虎豹峽坼睡鼉鼇  
况迺風水惡舟行牽挽勞  
嘆息

謂後夫吾應愧爾曹

別張仲明

仲明御史以諫貶

欲別執君手君行憶儂否日暮愁翻飛江頭立搔首山  
迴人不見風帆出高柳明明堯舜朝此別豈應有願子  
竭忠赤益酬主恩厚往事何足論逢人須閉口歲蕤菊  
與蘭歲晏還相守無令秋霜至摧沒隨藜藿

寄壽汪石潭宗伯

弟閒齋少宰

申甫不可作二疏跡難追公家賢弟昆視之奚愧為名



滿天地間身在雲水涯  
譬彼雙鳳凰高翔不可羈  
我願采芳菊泛彼黃金卮  
雲端托飛鳥為我往遺之  
斯以制顏齡永為國羽儀  
幸此未暮年起佐休明時  
勛華正在御邈哉臯與夔

送歐司訓赴靜江

昔我童穉年聞子才名振  
麗藻擅詞壇波濤驚筆陣  
雖云網羅密有才反見擯  
別來歲幾何忽訝繁霜鬢  
魚目俗所珍孰辨瑜與瑾  
今子領儒紳道德師後進  
此中一

青氍不博王侯印脩途自此始往哉幸加慎他日能相思尺書通問訊

秋夜言懷

秋宇澹無雲熒熒河漢長街頭人語寂明月照我床客子夜不寐攬衣起徬徨中庭涼露積繞砌鳴寒螢因之百感集中宵涕沾裳江南八月交稻熟已堪嘗況復秋風起還憶鱸魚鄉朋友訝不歸寄我書數行為言東鄰叟相約候耕桑豈不念離居時哉未忍忘誓將拂衣去

回首市塵黃

感事

望望城南隅彩雲凝不飛金輿遊幸地萬馬爭驅馳馬  
前擁才人校獵勇如羆一箭落飛鳥重賞窮民脂中有  
射鵬將姓名知為誰百金換一狐馬首絡青絲臂弓更  
腰箭突擊縱所為一從恃寵愛立致傾國貨威勢何翕  
烈顧盼生陸離君看草頭露轉瞬盡朝曦因風致危詞  
彼昏恐不知

指江彬

送同年傅希準憲副之河南

憶醉杏園春近在廿載前朋舊忽寥落參辰各一天有  
客蓬島姿來泛遼海邊相逢解岑寂令我心豁然念子  
初仕時瀟洒禁中仙俄遷江上羣佳政早流傳一從登  
憲府往苒將十年今復辭京闕遠上河洛船秋蟬號衰  
柳暮鳥衝寒烟惆悵從茲分莽莽隔山川遠役何足悲  
脩途願勉旃無令壯心摧贈予以龍泉

題三錫錄

少司馬我峯潘公自為巡海副使及為都御史  
巡撫遼東及提督操江三奉璽書矣而前後頒  
賜誥勅封贈其祖考妣亦且三矣今以所得制  
詞錄為一冊曰三錫錄云

新安文獻郡君家獨推先衣冠萃一門金玉清相聯卓  
哉司馬公清白自家傳功名三十載持節多在邊虎符  
歸把握龍勅屢傳宣允稱絲綸命何慙報答年以茲結  
主知華要地頻遷貤榮三錫命恩霈及重泉璀璨琅函

重淋漓御墨鮮感茲時展讀珍重托瑤篇我觀潘夫子  
忠孝道兩全勗哉圖令終庶以企前賢

張工部邀遊陳國戚莊即席分韻

得辰字

終日困羈旅驅馬出城闌折簡辱招遊感子故意真誰  
家好池館金張帝室姻入門金奏作歌舞掩比鄰勸客  
琥珀杯坐客錦繡茵復具麒麟脯充此盤中珍是日天  
氣和微風吹白蘋林深鳴好鳥水淺見脩鱗小浦容舟  
入遙山隔座新我來縱遊覽已足浣心塵况復同胞友

語笑情彌親於茲不痛飲落花笑殺人他年江海上相望參與辰

送費鍾石庶子考績入京

憶昔同登科相好如弟兄回首祇昨日倏更廿寒溫中間幾聚散風雨最銷魂今我偶南來而子復北轅臨岐重執手惻惻夫何言祖道值春晚落花擁籬根何以贈遠行采掇思芳蓀夫子玉堂英詞賦陋文園今去定承寵重上金馬門同時持橐入借問今誰存江水日東注

義和忽西奔願子早登庸捐軀答至尊俊也下駕才恐  
負海嶽恩別來各努力餘事置勿論

送鄭諧甫

諧甫念親成疾自工部員外郎疏改南京刑部以便省親

長安帝王都仕路此通津冠蓋滿朝省共喜侍龍鱗之  
子胡不樂念我白頭親引領城南隅淒然獨傷神尺疏  
回天聽稽首頌皇仁喜深起沉疾解棹潞河濱行當慰  
倚閭一笑慈顏春我昔客金陵憐渠風物新江流抱城  
郭山翠落衣巾且言麗晨旭瑤街淨纖塵形勝冠全吳



氣候近吾閩白魚兼紫笋調膳足羞珍由來天性樂外  
物莫比倫君親豈有異孝子亦忠臣絕裾應府辟彼哉  
溫太真

五言律詩

和李蒲汀少宰喜雪二首

怪底嚴寒候花飛遍八荒人皆欣歲事我更念戎行隴  
麥萌應綠江雲色半蒼從來感格意不在走羣望

三白呈祥日羣黎引領時輕隨柳絮舞潤許麥苗知郢

上慙高調山陰負宿奇祇應且飽飯歌舞答恩私

感懷

細雨梧桐外蕭然草閣秋病餘還藥石夢裏只松楸世事看多醜妻孥勸早休不愁生計薄萬卷是良疇

大安道中

因悲鄉井異寓目思紛紛野店沒青草山田種白雲雨聲連晦朔日色變朝曛道有瘡痍者大安異所聞

送指揮鄧安守脩真定二首

武舉門生

射策占高名分符鎮列城軍聲千里振智術萬人驚坐  
擁青油幕行巡細柳營祇今須將畧慎勿厭談兵  
兵法滿胸中奇謀妙折衝共榮分閫寄還擬取侯封落  
日明旌旆飛霜上劍鋒即看殘寇滅銷甲事春農

次馬西玄司業齋夕

天低垂戶外斗轉宿城陰卧病拋書卷偷閒解佩衿坐  
憐明月近夢破白雲深正爾愁岑寂鐘聲出暮林

將抵昌平

百里昌平道停車日未昏浮生渾作夢舊事復誰論山  
色圍平野溪流抱獨村向來征戰地營壘到今存

五言絕句

題小畫

林密青相憂山空翠欲流吹簫何處客日暮未歸舟

七言古詩

送南京太常卿穆公玄庵致仕還山東

前學士

先生海內稱儒宗氣格不與俗人同晚以著書為寔歷

道着利名面已紅今者抗疏辭天子拂衣去伴商山翁  
我歌送之感且嘆却慙羽翼在樊籠豫愁別後知音少  
臨分更為撫絲桐曲終酒罷各分手泠泠江上多清風

題故人江千戶味泉卷

憶昔聯舟下江水月明杯酒吳江中十五年來渾一夢  
幾回念我枉詩筒今我不樂歲又暮思君空佇南飛鴻  
近聞解印謝塵鞅頭白頽然成老翁間來只辨江心水  
汲取烹茶陸羽同我似相如多渴病每日視草明光宮

安得就君分一勺坐遣胸中臆慮空詩成對雨支頤坐  
冷風颯颯鬢雙蓬

送沈太守大楠之延平

我昔與子投氣分愛子胸襟無俗韻幾歲為郎坐粉闥  
一麾出守還山郡郡城樓閣枕山巔二水交流匯其前  
近郭千家燈火市緣溪萬頃桑麻田比聞凋敝漸非古  
愷悌今逢賢府主敷政還回列縣春洗冤更有隨車雨  
閩中道脉却在茲城南尚有延平祠祠下溪毛清可摘

門牆仰止有餘師

送劉紫巖被召還朝

公昔官居學士院承恩數上金鑾殿一從休直下西清  
南國山川題欲遍邇來宵旰勞天顏已聞下詔徵公還江上  
空懷鷗鷺侶朝端定接夔龍班偶逢菊節開芳餞極目  
烟波錦帆遠心如江水只流東節比黃花偏耐晚簪筆  
重看侍講幃鳳池揮翰迅如飛更欲煩公經緯手殷勤  
為補山龍衣

送大司徒興浦王公考績入京

落日滿川春樹晴東風江上錦帆輕把袂問公從此別  
幾時棹返石頭城石城樓閣煙花繞公在江湖憂廊廟  
誰云卧洛似富韓共言分陝同周召三年報政拜彤墀  
正是重瞳注想時宣室倘承前席問東南赤子多瘡痍  
瘡痍滿目何時愈便合留公輔明主白雲休戀故山棲  
海內蒼生望霖雨

贈朱雲岩司諫



瑣闥仙郎冰玉姿襟懷好似杜拾遺孤忠時上皂囊疏  
餘興春吟白雪詩南國三年行報政傾城餞送車馬盛  
幾番飛夢繞親闈彩衣今喜逢家慶春酒高堂何限情  
東風引棹上玉京曉漏還隨鷓鴣入朝陽共聽鳳凰鳴  
聖皇納諫同堯舜山甫之職當補袞君看千年青史上  
惟有忠孝流聲遠

送陳中丞虞山之南轅

東吳之山虞山高秀拔衆山誰與伍終日出雲遂為罪

利澤在人惠良溥公之奇秀自岳降貌似古人心更古  
仕途坎壈三十年晚始擁旄開制府先聲想已到百城  
楚女越童爭歌舞彩幡風暖春行縣畫戟霜飛秋按部  
閭閻從此無瘡痍道路還聞息豺虎我老為儒迂且腐  
日給太倉慙何補祝公惟願政有成早晚還朝事明主  
送陳太守汝宗之東昌

博平郡守太丘孫粉署為郎名藹藹公退閉門謝俗氛  
其中有草生書帶矯如冬寒挺孤松清比秋蟾印溪瀨

北都藝苑職校掄何限賢豪歸盼睐望重清時久見推  
恩深大郡俄超拜共言才可濟時艱却喜身還隨道泰  
南浦離筵芳草邊故人班馬垂楊外杯傾春釀休辭醉  
魚出寒水無可膾昇平海內官府樂澶漫山東疆域大  
南通舟楫控江淮東望山川連海岱赴官誰不羨朱輪  
作縣人爭瞻皂蓋閭閻憔悴今應甦使君豈弟民所賴  
淮陽卧治還有成潁川課職當居最一麾豈足為君淹  
鐘鼎勛名端可祭

送俞經憲惠民考績入京

俞經憲係尚書琳公之子

我昔官居白玉堂五更振珮朝明光君之先人司喉舌  
獻納從容在帝旁每見殿東供奉退鳳儀秀拔重班行  
自我不見今十載傷心耆舊半存亡君才不忝名家胄  
法冠豸服何輝煌弭節留都剛會面又聞奏最上江艚  
閃閃旌旂輝白日明明畫戟飛秋霜行處想應無豺虎  
山妖水怪盡逃藏比聞處處驚男女江南江北多旱蝗  
官府誅求何日已閭閻百孔兼千瘡我曹肉食慙無補

言之感激熱中腸君侯忠孝夙自許觸目民隱心悲傷  
此去應前宣室席願無緘默負吾皇臨分不盡叮嚀語  
意逐東流江水長

送丁西丘

丁君自是東吳英讀書多似鄭康成夜光暗擲無人識  
西丘結屋學逃名雖曾薦起至王國鱸魚味好薄侯鯖  
伊昔漢五侯氣勢何翕烈子雲之筆札君卿之唇舌出  
入門下附炎熱當時裘馬雖輕肥惜哉白圭已玷缺豈

若西丘短褐騎羸馬來往江湖自瀟灑短刺不投公府  
中長裾恥曳侯門下今年金陵初識面愛子風情何邈  
緬玉塵高談坐為傾彩毫題句人皆羨鳳凰臺白鷺洲  
南朝古寺都遊遍一朝興盡忽辭歸向我索詩入行卷君  
行君行慎勉旃他日試看高士傳

七言律

興田再逢卓進士起竒

平原分手太匆匆却喜今朝語笑同盡日舟行山色裏

幾家人住水聲中江湖自笑長為客齒髮那能久不翁  
明日停橈武夷下細將真訣問崆峒

送陳縣丞崧回建陽任

幾回來往建州道下馬逢人說好官一見又為天外別  
相逢真似夢中看雷霆入地驚湍吼虎豹躡林亂石攢  
我昔仗君曾脫險追思珠淚不勝彈

余昔南歸至建陽下  
灘舟破幾溺此君冒

險來援  
故云

寄從孫鳴盛

時鳴盛為白蓮驛吏

我因作宦多江海汝亦離鄉幾歲華  
細檢來書同會面暫隨歸夢一還家  
蓮開驛舍清風遠柳發河橋別思賒  
早晚劍津繫舟楫可能相候夕陽斜

時公將北上

早朝

帝城瑞氣曉氤氲鳳閣參差勢入雲  
馳道爭聞傳警蹕垂衣重見拱華勛  
仗移雉尾班初合身近螭坳詔得聞  
薄劣十年叨侍從自慙何以答明君

送別駕族孫宗啓赴徽州



尋常送客不曾悲，送爾停杯惜別離。  
作倅正當山水郡，致身真負聖明時。  
百年富貴非吾願，前輩風流是汝師。  
涉世久知才有用，豈同儕輩衆嫵癡。

首言春懷

禁城殘雪未全消，又見春歸到柳條。  
鄉國忽驚魂夢斷，風塵暗遣鬢毛凋。  
一尊得醉聊開口，五斗雖貧恥折腰。  
自愛木蘭好烟水，賦歸不用小山招。

慶成宴次韻

中左門間坐講臣九霄地切侍龍鱗禮成湛露開周燕  
澤普濡雲識舜仁翠管細傳仙樂曲瑤盤頻送御厨珍  
小臣既醉歌天保願祝皇圖億萬春

送丁太守之撫州

佐邵南州舊有聲一麾今去領專城鈴齋晝靜留高詠  
稻隴春晴看耦耕聖代淳風無楚越漢廷良吏盡公卿  
君才不止二千石拭目雲霄萬里程

送都諫朱應周赴闕

羨君此去際芳辰南浦歌殘草色新供奉再通中禁籍  
飛騰不負百年身久聞西北馳邊報又道東南脩徼巡  
廊廟可憂非一事納忠元屬諫垣臣

送劉編脩舜弼判大名府

舜弼由左給事改檢討史成陞僉憲有言舜弼  
不當外補者改陞編脩舜弼上疏辭坐忤旨謫  
抗疏清朝辭好官一麾謫去遠龍顏朋簪聚散萍蓬外  
仕路升沉夢寐間秘閣共嗟劉向去長沙終見賈生還

君恩隨地堪酬答莫羨逍遙侍從班

送林司訓尚懷之辰州沅陵縣學

樽前把袖日初斜共指江潭去路賒送客不堪逢歲杪  
緘詩何惜到京華洞庭天濶雲垂野湘浦秋深雁泛沙  
聖代祇今賢是寶莫教地產止丹砂

題黃隱君南山草堂

一區深塢可藏春盧橘楊梅次第新九陌風塵不到地  
百年雲水自由身軒中留客惟碁局枕上看山亦葛巾

聞說藏書餘萬卷青雲還屬後來人

送從姪國仁行醫嶺南

竹林風日不同遊又向江頭問去舟  
天地百年皆逆旅風烟五嶺亦中州  
樹深雲鎖千岩暝水濶天連一鴈秋  
聞說隨身多藥餌用時須向古方求

送林主事二山謫夷陵

莫言人世重依違青史他年有是非  
賈子憂時聊短䟽屈平直道是危機  
偏州謫倅衣冠惜三楚經行草木輝

從此台還知有日別君何事更沾衣

春日同友人重遊鄭氏水亭

江村花柳春猶淺水郭亭臺日正遲  
慢卷暫教山翠入尊開側見竹光移  
朝簪未許真拋得杯酒應拚與醉期  
況是同遊無俗侶憑君更續舊題詩

過淮聞駕還至揚州

東南紫氣鬱葱葱清蹕時勞下九重  
花夾綺羅通御道旗分龍虎盛軍容  
三秋魚鳥驚天仗萬國衣冠翊聖躬

盡說歸來罷。巡狩已聞中詔。撒行宮。

送黃以承遊遼陽

長亭日暮酒初醒。策馬西風問去程。幾處啼猿催客淚。  
滿林落葉送秋聲。鳴笳畫寂狼烟淨。貢篚東來鴨綠平。  
燈火萬家絃管沸。不知遼海是邊城。

遊城山遂宿岩舍

蹤跡城山近已稀。重來遊衍暮忘歸。高臺突兀凌虛白。  
古刹荒涼隱翠微。上界僧歸梵磬響。低林鳥宿佛燈輝。

邇來自覺塵緣薄不為入山不息機

葉坊遇雨暫憇驛後小軒撥悶次柏莊壁上韻

古木脩篁護小軒溪雲谷鳥伴閒眠  
烟花冉冉驕陽月風雨瀟瀟寒食天  
行役敢辭南又北憇居真以日為年  
偶逢故舊開官醞一飲直須吸百川

贈浙江大叅朱南岡次素翁韻

年資端與望俱深況復名高翰墨林  
地遠夢回青瑣闥官清吟對紫微陰  
廟堂尚賴經邦手江海常懸補袞心



最是越中山水好公餘何惜暫登臨

送同年堯別駕瑄回惠州任

河橋欲別惜分違把袂相看到夕暉  
好向一官思報稱願從同榜借光輝  
青青草色留人醉片片楊花逐馬飛  
此景不堪頻悵戀嶺民翹首望君歸

鈴山堂為祭酒嚴公題

高懷偶與碧山俱吟對鈴岡興有餘  
小閣乍開延紫翠層樓遙望入清虛  
一簾樹色留啼鳥萬卷芸香避蠹魚

仰止定知聞道早宮牆咫尺聖人居

堂近學宮

春日感懷

寒食時作

柳綠鶯啼二月天  
家家門外泊湖船  
傷心世事隨流水  
回首春風又隔年  
客路紅塵心半染  
親墳宿草恨長牽  
亦知溫飽非吾事  
負郭何須二頃田

題瑞榴圖

有序

嘉靖乙酉秋予與宮贊蔡衡仲等六人宴於內  
館有中貴以石榴見遺大小八九枚蓋植之禁

中者諸君謂石榴多子坐下惟侍講葉叔晦尚  
未有子請以為兆既歸鄭侍講陳魯南作石榴  
圖贈之諸君有詩予亦效顰

石榴有子兆開先況復來從雨露邊一座驚看無似者  
諸公持贈不徒然家如王祐多陰德齒及商瞿未暮年  
見說近來蘭入夢試看明月掌珠圓

送鍾大尹之湖口縣

作宦潯陽興亦佳不須勾漏問丹砂水當縣郭時時白

山倚江城面面遮  
民醉却逢終日社  
官閒每放午時衙  
使君自是今潘岳  
試看河陽一縣花

秋日小齋偶成

秋來風物總堪悲  
寂寞空齋獨坐時  
霜氣暗凋門柳色  
露華寒動井梧枝  
才非用世歸須早  
事不縈心起每遲  
更欲移家深竹裏  
不教姓字俗人知

壽從叔母丘太孺人

叅政公母

年年問訊鄉園使  
齒髮祇如初  
別時共喜承恩當晚暮

曾聞卜壽過期願三食不換公卿貴內行還堪族黨歸  
憑仗春風階下竹平安長報客邊知

燈下讀劉寔夫都諫詩集

新詩讀罷燭頻彈東壁垂光照夜闌已有聲名高諫院  
況兼風雅擅騷壇心降合作低頭拜病起還思洗眼看  
巴客縱能歌下里其如郢曲和皆難

早朝

肅肅千門虎旅屯月斜劍佩影初分鈞天樂奏萬年曲

寶鼎烟騰五色雲  
香寮金闥清漏轉  
聖明天語近臣聞  
太平時節身難遇  
萬國同心祝聖君

送少宗伯嚴公掌禮顯陵

使星何處照人紅  
路指江陵漢水東  
旌節曉看衝朔霧  
樓船秋喜借湖風  
威儀漢室原存廟  
禮樂虞廷重秩宗  
何限瘡痍吳楚道  
煩公細采達重瞳

寄福清林世卿舊契

聞其移居涵江故云

昔年湖上訪茅廬  
五月扁舟過雨初  
舊事怪來連夕夢

故人別後幾封書  
新遷涵水鳴珂里  
何異庾桑畏壘居  
我擬官成賦歸去  
卜鄰相伴老樵漁

送內兄朱國賢赴欽州司倉二首

憐君垂老涉鯨波  
落日風烟奈別何  
睡石江頭秋月冷  
分茅嶺上瘴雲多  
蠻鄉酒熟何人共  
海國書來有鴈過  
豈是天涯成遠別  
出門回首限山河

對君強飲不成歡  
連日眉尖別思攢  
兩鬢十年非故貌  
一身萬里更微官  
風塵為客吾將老  
世路無媒古亦難

相約抽身早歸隱木蘭烟水有漁竿

懷同年鄒少叅敏行

萬里蒼梧書未還時占劍氣斗牛間君才雅稱名藩牧  
我病猶慙近侍班世事浮漚曾足問人生黑髮未容閒  
詩成寄壽憑歸翼目斷寒雲隔萬山

題方松崖司寇賜謚簡肅卷

官聯八座望尤崇凶計俄傳嘆息同屢觸雷霆驚壯節  
終垂日月照遺忠山中續食清廉吏身後易名簡肅公



感舊懷賢嗟莫及淒然淚洒向西風

喜仲脩弟奉使便道抵家

幾度人來報使旌暗中吾自數歸程相逢歲晚翻疑夢  
忍說春來又卜行風雨幽懷何處寫江天病眼此時明  
夜來春意知多少步到前庭問紫荊

送仲脩弟尹永嘉

觀風南楚人猶羨領邑東甌爾自知凍合遙空辭我地  
春回滿縣到官時事於忙後宜防錯言向甜中恐售欺

歲歲東風池草綠夢中相憶自成詩

送宋琪祥尉翁源

離亭客散夕陽低江樹依依送馬蹄  
但使雲緘無斷續不妨塵跡各東西  
春山雨過蠻溪漲曉岸花開越鳥啼  
我有一言君記取歸裝南物不須攜

別同年祝遜緒憲副

前庶吉士

憶在武夷同醉日感君高韻薄秋雲  
今來手握山東憲衆許才空冀北羣  
塵世浮名春夢似玉堂舊話夜燈聞

年來鬢髮俱非昨要遣丹青早策勛

清河道中

年來百事不堪論獨得山遊興尚存千里鐘聲疑有寺  
數家烟火自成村秋高樹有凌霜葉水落沙仍帶雨痕  
最與鄉園相似處幾株殘柳對柴門

送管通政汝濟奉使秦中兼過家候母

曉日爭看漢使旌衣冠祖餞欲傾城回瞻北極心應戀  
歸見終南眼倍明駟馬今過題柱處關人舊識棄繻生

倚門應念親頭白不獨歸為畫錦榮

過劉寔夫都諫舊宅偶成輒寄

時劉謫江西藩幕

柴門寂寂晝長扃苑樹移陰霜滿庭共許登堂論契濶  
今來立馬嘆伶俜朝中舊恨平津閣湖上清風孺子亭  
試向滄浪問漁父此時還有幾人醒

澄心亭偶成

在南堆

倦來散步遶池行池上風生白  
亭輕春雨小堂留燕語  
夕陽高柳逗蟬聲杯深向客難同醉夢熟何人却喚醒

可是閒官無限樂官坊翰苑總登瀛

別仲脩弟

時仲脩將赴浙江僉憲

馮唐頭白尚為郎  
覺爾旌麾去有光  
共羨驂騑今展足  
誰憐鴻雁各分行  
西湖春近梅先白  
上國秋初葉已黃  
惆悵彭城離別地  
幾時風雨復連床

送南京冢宰紫岩劉公考績入京

天曹最績奏神京  
望重三朝屬老成  
江上曉雲侵旆濕  
梅邊臘雪照船明  
人傳左右虛台席  
帝睠尚書識履聲

共喜茲行歸鼎軸致君應見世昇平

同丘郎中子時龔狀元鳴治郊遊至三忠祠新濬  
通惠河邊感興一首

馬首風塵苦未休三年剛得此回遊樹藏宿霧迷宮苑  
水遶平堤接御溝黃犢眠來千嶂晚翠禽啼斷半溪秋  
多情更有臨淵羨擬向滄浪上釣舟

送戴縣丞

客中別子恨難禁况復蕭蕭秋滿林君去脩途宜努力

我於時事每驚心半生身世江湖遠  
百里桑麻雨露深  
佐邑想應多暇日哦松庭院晝沉沉

題竇惟遠家慶圖

是年太夫人年九十惟遠已為郡守子一桂新舉進士

好事重重慰北堂清朝甲第喜傳芳  
曲江宴罷袍新綠  
太守符分帶已黃漢室勛名看並美  
韋門慶澤羨逾長  
桂枝元是君家物借問今年第幾郎

歲暮坐南雍官舍見山亭偶成三首

屋外山光碧四圍幾株松桂傍山扉  
何妨移竹供瀟洒

自愛開樽對翠微  
啼鳥聲中驚節換  
寒梅枝上報春歸  
獨憐遠客風塵裏  
回首年年憶釣磯

小小亭臺短短牆  
茅齋靜處著繩床  
排簷寒色幾竿竹  
隔座輕烟一瓣香  
明鏡未容悲歲晚  
青山也解笑人忙  
年來飽飯便便睡  
夢裏身如在故鄉

霜風淒慘歲華深  
木落空庭噪暮禽  
猶有翠筠堪志節  
豈無碧水可澄心  
浮生跡似漂流梗  
造士功慙躍冶金  
草閣捲簾時自遣  
孤吟遙對白雲岑



大司成鍾石先生枉顧不遇留詩壁上次韻

一經幸際聖明時  
宦轍東西任所之  
瀟散迹還兼吏隱  
癡頑心祇似童兒  
借來法帖臨池習  
乞得名花帶雨移  
地僻每迂高士駕  
才疎敢和古人詩

送南京主客郎中鄔紳守青州

握虎分符出擁騶  
共言官是古諸侯  
印閒不比分公司  
日山近偏逢露冕秋  
田里幾時歌樂業  
廟堂此日得分憂  
別來不惜雙魚寄  
應有潮來到石頭

博士蘓璞學正方邦望同日拜節推蘓在桂林方  
在廣州予為賦一律各書一通贈之

簷鵲朝來送喜忙  
俄聞新命下鱣堂  
共誇騰踏能千里  
獨惜翻飛各一方  
越地重儒知俗美  
周官垂訓要刑祥  
俸錢縱倍賢關日  
須信齏鹽滋味長

送李賓學錄赴襄陽別駕

方城漢水今猶昔  
舊事銷磨一夢間  
遺愛尚稱羊叔子  
清風猶說鹿門山  
民窮賴汝勤安輯  
俗薄憑誰力挽還

竹馬歡迎何足羨  
要看去日衆號攀

進春次柯石莊韻

漏轉彤樓唱曉鷄  
千官鵠立殿東西  
香飄輦路佩聲合  
日映宮雲扇影齊  
已覺永消流水細  
即看花重亞枝低  
天家可是春偏早  
禁柳宮槐鶯亂啼

送曾秋官于暘決囚江南

便道過舍

霜鴈南飛日又斜  
官船催發鼓頻挝  
三年幾作還鄉夢  
八月真看泛斗槎  
幽似覆盆仍望照  
春回枯井也生芽

簡書可畏歸須早肯為江南滯使華

壽張太夫人

學士惟信先生之  
母時初陞少詹

迢迢蜀道阻潘輿使者頻歸問起居筵出上尊黃粟酒  
函開御墨紫泥書也知綵服心長戀其奈巖廊席久虛  
書報北堂應一笑聖恩新遣佩金魚

題南京守備太監晏公卷

晏公名宏

清名儉德重當時道路人傳即口碑全陝山川遺愛在  
留官管鑰舊臣宜門無雜客跡如掃案有殘書手自披

幾疏乞骸恩未許朴忠應結九重知

歲暮官齊夜坐

擁爐獨坐有餘情箭漏聲傳忽二更一樹寒花鈴閣靜  
半庭殘雪紙窓明賞心自愛年芳近回首翻憐世網纓  
牢落異鄉歸未得只憑春酒破愁城

同年鄭成昭將赴南京刑部留詩為別次韻奉贈  
誰將短笛怨中吹腸斷孤鴻對落暉賓館正逢塵榻下  
秋江又報客帆歸天涯同榜幾人在江左前朝舊事稀

却憶太平門外路  
隔湖烟樹雨霏微

送杜太守之南寧

弟昆托契十年中  
人事浮雲逐眼空  
君已分符嶺以外  
我仍簪筆殿之東  
才能濟美古猶少  
志在酬恩遠亦同  
須識別離無限思  
江流目斷是南鴻

題林主事汝桓夢槎奇遊卷

時汝桓謫徐聞丞前  
一夕有乘槎之夢

流落炎州未足嗟  
乾坤隨寓即為家  
昔賢此是授荒地  
異事今傳入夢槎  
高節崢嶸昭日月  
浮榮聚散等雲霞

愛君不得從君去目斷南天嶺樹斜

和秦鳳山司空喜雪

三日齋壇致禮同俄看飛絮已漫空誠孚未覺天心遠  
瑞應元知世運隆香爇龍涎酬景貺占憑鷄骨報年豐  
多情欲和陽春句凍筆呵成愧未工

陛見日隨例賜枇杷詩一首

時自南京祭酒召至

江海重承召命新彤庭虎拜覲龍鱗君恩似借微臣寵  
仙果先頒內府珍翠篚擎來金彈滿冰盤捧出絳珠勻

薦餘正席嘗偏好未有涓埃答帝仁

賜藕

碧藕堆盤玉不如窮冬風物更憐渠  
領從御府榮方重嚼罷文園渴已除  
恩比連絲知未斷心能容物愛中虛  
毫分無補真叨食慙愧黃封走使車

賜鮓魚

禮成薦鮓聖心懽恩許嘗新遍從官一飽敢忘明主德  
百年深愧腐儒飡鑿刀細切憐霜膾官醢旋開侑玉盤



食罷感恩思補報馮驩長鋏未須彈

示從姪貴英二首

貴英占籍湖廣茲貢至京師相見悲喜作以示之且諷其還爾

別久重逢問濯纓尊前相對夜燈明  
異鄉骨肉堪流涕故國交遊半死生  
富貴誰無桑梓念江湖久負鷺鷥盟  
何時粗了乾坤債歸去青山學耦耕

江湖為客久沉沉幾度書來慰我心  
白壁空教雙足別紅塵已覺二毛侵  
鍾儀居晉還南操莊舄思鄉祇越吟

三尺漁磯便堪老此中費得幾多金

貴英恐貧不能歸爾故末句云云

送貴英之名山司訓

貴英自入湖廣遺其妻在家今益貧且老矣予欲其攜之

官故有

第四句

才頗如人命不如江湖落魄幾年餘一官老始分鱸席  
千里妻能挽鹿車心泰也知由樂道眼昏可得便拋書  
但求苜蓿盤中滿彈鋏無勞嘆食魚

壬辰九月二十二日再入講筵進講得詩三首

時自

南京祭酒召

還再入講筵

蓬萊殿閣隔塵囂雲捲珠簾講幄高扇影開時瞻御座

鑪烟飛處簇宮袍橫經未覺天顏遠問道應忘玉體勞  
身際明時叨侍從猶慙無術補秋毫

邇英持索總儒紳香案前頭立講臣頗怪地偏饒雨露  
不知身已近星辰彤墀仗簇皇威肅玉几書呈御覽新  
講罷自天傳賜宴九重喜色溢龍鱗

百官朝退翠華來日映紅雲講殿開駙馬帶刀還夾陛  
將軍列戟盡銜枚論思地禁榮重入簡拔恩深愧不才  
宴罷仍從東觀集直疑步武接三台

送鮑侍御象賢赴湖廣僉憲

向來道路避乘驄  
今拜外臺秩更崇  
身遠躊躇封事簡  
冠仍豸角觸邪同  
開尊暮對瀟湘雨  
弭節秋生鄂渚風  
極目江天迷楚望  
夜來空仰法星紅

樊大叅孝甫需次京師為同年會諸公有詩輒和  
嘆息曲江同宴後  
年年減却會中人  
別來見面翻疑夢  
老去交情轉覺親  
鏡裏勛名嗟未晚  
花前酒盞勸須頻  
逢君祇合騰騰醉  
明日相望參與辰

從孫貳守宗啓已去寧波寧波為去思卷以遺之

宗啓有詩輒和

宗啓歷徽州通判寧波同知  
遺愛在民故有第三句

時來千里慰衰遲洗眼燈前手自披遺愛曾聞隨處有  
古音休嘆少人知明時失士良為恥壯歲還山恐未宜  
正是聖君求治日滄江誰許釣綸垂

題草堂雪齋

鄆城樊公宣德中以行軍司馬駐  
師濟上暇日過故鄉適草堂初成

積雪新霽公甚樂之東里諸公皆有  
詩今其孫憲副孝甫索題故為賦之

故鄉歸作雪中遊萬里凝華漾素秋色借旌幢兵氣合

光連營壘陣雲收成功豈必調商鼎料敵何如下蔡州  
舊日草堂無恙否門前時見擁鳴騶

送南大理丞林次崖考績入京

予時初至南都

君在江南正憶渠我來君復動征車如何鴻燕時難並  
可是參商迹便踈閉戶只窮羲氏學憂時曾上賈生書  
茲行績奏天顏悅應得承恩佩紫魚

送江京兆景熙考績入京

兩為三輔號

闕

平千里耕桑藹頌聲漢史無勞誇長倩

韋門又喜得玄成江空山色依帆轉闕曉鐘聲雜佩鳴  
朝謁承明輪奏對可應無語及蒼生

陳子道脩來南京求銘父墓賦此送之

孤舟夜雨一燈青卧聽城烏淚暗零千里子心憐寸草  
百年人世嘆浮萍情深未掛當年劍才劣猶慙太史銘  
身在異鄉親淺土莫辭歸路載殘星

送潘莪峯少司馬赴召

徵賢詔下促驪歌江上風煙別思多羣從幾人登正路

九霄何地答恩波  
籌邊即見銷金甲  
待漏重看振玉珂  
若向江湖懷舊侶  
緘題時托鴈南過

翰林舊僚脩瀛洲  
會于憑虛閣  
限韻得微字

予時以禮

侍來南都  
蓋再至矣

多病長思卧翠微  
重來江閣坐朝暉  
未能報國心徒戀  
且喜看山願不違  
對酒忽聞啼鳥過  
賞春空惜落花飛  
分明此地真蓬島  
吟倚闌干晚未歸

送賴廷穆經衛之湖廣



落落才名迥出羣紫髯又見作叅軍書生莫道不知武  
記室從來要有文別路共傷千里月懷人知隔數重雲  
三湘春近多來鴈却要音書別後聞

湖邊小寺避暑

炎炎畏景晝偏長竹簟藤床覓上方出戶便驚塵土滿  
脫巾且趁水風涼徑松滴翠凝冰硯砌竹分陰上粉牆  
頭白老僧無一事惟將雙眼看人忙

齋居二首

空庭誰種萬琅玕贏得齊時對榻看座起午烟應淪茗  
簾垂暮雨漫焚檀燭柴何幸逢周典簪筆也曾忝漢官  
今日甘泉誰扈從夢回星月近瑤壇

焚香掃地擁氍毹却飲辭輦稱病軀卧向青山三日後  
消來雜念半分無風應掃霧開千嶂雨為清塵遍九衢  
郊罷願頌寬大詔坐教海宇盡懽娛

送陳望之赴臨清管河州判

前貴州郡幕

歷盡山川力未休一官今去贊刀州清名何必羨留瑣

利器還應見解牛客路秋初飛一葉官河日晚泊千艘  
寄書莫道無來鴈人在蓬瀛正倚樓

送陳國英侍御之南京次見贈韻

士行公才俱絕儔烏臺新拜寵恩優朝廷正合留長孺  
鄉里應多識太丘雪意遠含宮樹暝江聲寒送石城秋  
南朝古寺題詩處何日從君覓舊遊

壽王逸軒

僑寓金陵稱壽後將  
歸老槎溪故居矣

隱居谷口漫逃名時有高人扣竹扃枕簟晝長迷蝶夢

江湖天濶羨鴻冥囊收珠玉幾千首家住蓬壺近百齡  
他日一盃何處祝夜深頻望老人星

初秋懷山中友人

又覺金天爽氣新古今不駐是羲輪月明萬戶懸砧杵  
日落扁舟罷釣綸遙憶故人多夢寐獨憐晚歲尚風塵  
幾時投老青山下共汲清泉煮澗蓴

喜族人至

病客逢秋憶故園汝來應得賴溫存江湖歲晚身千里

骨肉情多酒一尊  
別後關河長問愁  
來風雨更思君  
西窗燈火寒無夢  
舊事中宵得細論

題竹

此君標格最堪憐  
幾度相看思悄然  
密葉風含聲細細  
高梢露裛色娟娟  
影分枕簟疑無暑  
潤映琴書合并妍  
我欲結君為密友  
相將同到歲寒天

秋夜旅泊言懷

空江木落奈愁何  
卧聽霜鴻帶月過  
老去身浮青雀舫

秋來夢入白鷗波青牛早解莊生語衰鳳真慙楚客歌  
早晚歸尋樵牧侶深山結屋傍雲蘿

送南京潘少宰希周赴少司寇之召

十年不作清都夢直道受知自聖君恩重江湖來召命  
秋深鴻鴈惜離羣公卿不貴深持法竹帛還期早策勛  
預報商霖今有兆為公指點出山雲

壽大宗伯甘泉先生二律

平生用世守遺經老去真為國典刑班馬文章高漢代


夷變禮樂重虞廷身輕似得長生術名就猶當未暮齡  
人物斗南稱第一他年汗簡有餘青

嶺表衣冠幾百年曲江公後更誰賢早能見道陳編外  
晚却遊心太古前馬帳談經羅俊彥鳳池揮翰待儒仙  
須知輔養吾君德却要伊川在講筵

送倪考功赴浙江少叅

一門圭組羨多賢金榜金緋獨妙年歸省正逢家慶日  
別離須記歲寒天南都人物陽秋裏兩浙山川節制前

到處瘡痍應可念城西休問泛湖船



方齋存稿卷十